



Inatsisartunut ilaasortaq Anthon Frederiksen, Partii Naleraq
Maani

§ 37 – 051-imut ulloq 12. februar 2016-imeersumut akissuteqaat

Brevdato: 16-02-2016
Sags nr. 2016-3103
Dok. nr. 8265225

Apeqqutinut ulloq 12. februar 2016-imeersunut nassuineqartunut qujanaq. Matuma kinguliani apeqqutit issuarneqarput akissuteqaat kingulianiilluni.

Postboks 909
3900 Nuuk

Tlf.: (+299) 34 50 00

Fax: (+299) 32 52 86

E-mail: isan@nanoq.gl
www.naalakkersuisut.gl

1. Sanaartornermi nakkutilliinerup pitsaanerumik ingerlanneqalernissaa anguniarlugu malittarisassanut nutarterinissaq Naalakkersuisunit pilersaarutigineqarjaa?

AKISSUT: Maleruagassanut tunngaviusuni, maannakkut AP 95-imi: ” Kalaallit Nunaanni sanaartornermi suliassat atortussallu tunniunneqartarneri pillugit ataatsimoortumik piumasaqaatit” aalajangersagaasuni, allannguuteqartitsinissamik Naalakkersuisut maannakkuugallartoq pilersaaruteqanngillat. Taakkua maleruagassaapput ataatsimoortut misilerluarneqarsimasut atorsinnaalluartullu, illuliortiternermi illuatungeriit akornanni isumaqatigiisummik aallaaveqartut.

2. Sanaartornerup nakkutigineqarnera Naalakkersuisuniit qanoq malinnaaffigineqarjaa?

AKISSUT: Namminersorlutik Oqartussat inissialiortiternerannik sullissivinnillu sanaartortitsinerannik aqutsineq Ineqarnermut, Sanaartornermut Attaveqarnermullu Naalakkersuisoqarfimmit isumagineqarpoq, sulinerlu ingerlanneqartarpoq siunnersortit suliassaqarfimmut tamatumunnga naleqquttut peqatigalugit isumaqatigiisuteqarnikkut. Sanaartornermik nakkutilliinerup siunnersortimik tamatumunnga siunertaqartumik suliaqartinneqartumik sularineqartup nakkutigineqarnera, sanaartorfimmi ataatsimiinnerit imaqarniliorneqarneri aamma nakkutilliinermut allakkiat aqqutigalugit pinerusarpoq, kisianni ilaannikkut sanaartorfimmi aamma nammineerluni sanatitsisutut nakkutilliinikkut pisarluni.

Sanaartornermi suliassani aalajangersimasuni sanaartornermik nakkutilliinermi piffissani nutaanerusuni ajornartorsiuteqartoqarsimasooq isertuussassaangilaq. Tamanna tunngavigalugu suliniuteqarneq ”Sanaartornermi aqutsineq nukittunerusoq” 2014-imi aallartinneqarpoq, ilaatigut sanaartornermi aqutsisunut allanullu illuliortiternermut sanaartornermullu suliassaqarfiup iluani suliaqartuusunut pikkorissaanerit ilaatinneqarlutik. Sanaartornermi aqutsinermut ilitsersuut siunissami qanittumi nassiussorneqassasoq pilersaarutigineqarpoq, taamatullu pikkorissaarnernik nutaanik neqerooruteqarnermik malitseqartinneqassasoq eqqarsaataalluni.

Tamatuma saniatigut sanaartornermi kukkusoqarsinnaaneranut malittaasunillu ajoqusernerit pisinnaanerinik annikillitsiniarluni, suliassanut aamma suliap ingerlaneramik aqutsinermut sakkussat digitaliusut sanaartornermik aqutsinermit atorneqarnissaat Naalakkersuisoqarfiup pingaartippaa. Sanaartukkat

atorsinnaassusaasa sivitsortinneqarnissaa siunertaavoq, tamannalu inuiaqatigiit aningaasaqarnerannut siunissami iluaqutaassaaq.

3. Sanaartornermut atatillugu suliarinnittussarsiuussisarnermi suliffeqarferujussuit avataaneersut suliassanik tigusiitillugit, suliffeqarfiit nunatsinneersut pingaartumik aamma mikinerusut atorluarneqarnerunissaat qanoq ilillugu Naalakkersuisut qulakkeerinniffigisinnaavaat?

AKISSUT: Pisortat illulioriternernik sanaartornermillu suliassaasa suliffeqarfinit nunatsinni maani angerlarsimaffeqartunit suliarineqartarnissaat Naalakkersuisut annertuumik pingaartippaat. Aammami misilittakkat takutippaat illulioriternernut sanaartornernullu suliffeqarfiit sapinngisamik sumiiffimmut sanaartorfissamut annertunerpaamik attuumassuteqartut suliariumannittussarsiuussinerni angusarissaarnerpaajusartut. Pingaartumik suliffeqarfiit illulioriternernik sanaartornermillu suliassani anginerusuni suliakkerneqarsimasunut pilersuisuusutut suliaqartut aamma taamatut misilittagaqarfigineqarput.

pisortat illulioriternernut sanaartornernullu suliassaannik annertunerusunik neqeroortitsinermi, entreprenørrip suliaqartuusussap entreprenørinik pilersuisuusussanik toqqaanerani suliffeqarfiit najukkameersut sapinngisamik annertunerpaamik peqataatissagai piumasaqaatigineqartarnera, nalinginnaasuuvoq.

4. Apeqqut 3 –p piviusunngortinneqarnissaanut suliarinnittussarsiuussisarnermi inatsit allanngorteqqaartariaqarpaa?

AKISSUT: Naalakkersuisut isumaqarput suliariumannittussarsiuussineq pillugu inatsit allannguuteqartinneqassagaluarpaa, tamanna malunnaatilimmik sunniuteqarnaviangitsoq. Inatsisip atuuttup – maannakkut sanaartornermi neqerooruteqartitsisarneq pillugu Inatsisartut inatsisaat nr. 11, 2. december 2009-meersumi aalajangersagaasup – ilaatigut najukkami pissutsinik il.il. misilittagaqarnissaaq pillugu suliffeqarfinit piumasaqaateqarnissamut piginnaatitsissutinik imaqaarnera eqqarsaatigalugu, tamanna isigineqassaaq.

Aammattaaq apeqqummut 3-imut akissuteqaat innersuusutigineqarpoq.

5. Ilaqtariit pissakinnerusut akunnatsumillu isertitallit amerlanerusut BSU aqqutigalugu illutaarsinnaanerisa ajornannginnerulersissinnaanerit inatsisitigut allannguiffigineqarsinnaanera Naalakkersuisut qanoq periarfissarsiuussinnaavaat?

AKISSUT: Inissianut tapersiissuteqartarnermut aqqiissuussaaq, illulianut sanasunit sananeqartartunut atorneqartarpoq. Tassa imaappoq illu piginnittuulersumut, atortussat saniatigut aamma sananissamut taarsigassarsisariaqartussaasussamut, akisuallaalersimavoq. Taamaattumik 1990-ikkut aallartinneraniillu nutaanik taarsigassarsititsisoqanngilaq. Naalakkersuisut isumaqarput aqqiissuussaaq taanna ullutsinnut naleqqutinngitsoq, pissutigalugu illut piginnittunut akisuallaalertarmata. Taamaattumik aqqiissuussap taassuma ataani illunut nutaanut taarsigassarsititsisoqarnissaa Naalakkersuisut inassutiginnigilaat.

6. Ilaqutariinnut pissakinnerusunut akunnattumillu isertitaqartartunut aamma illoqarfinni nammineerluni illulioqataasinnaanermut/-sanaqataasinnaanermut periarfissiisoqarsinnaavaa?

AKISSUT: Nunatsinni sumiluunniit innuttaasut inissaqarnikkut imminnut pilersornissaminnut periarfissaqarnissaasa qulakkeernissaa Naalakkersuisut pingaartittorujussuaat. Nunatsinni innuttaasut, namminneq inuunerminnut akisussaaffimmik tiguserusuttut, aammalu nutaanik illup ullutsinnut naleqquttup atugassaritissinnaasaannik, ulluinnarni pitsaasunik atugaqalernissaminnik pilersitserusuttut, inissianik pitsaasunik atugassaqartinneqarnissaat pingaaruteqarpoq. Taamaattumik sanaqataalluni illuliassanut najoqqutassap ineriartortittuarnissaa Naalakkersuisut isumagaat, taamaalilluni taanna innuttaasunut sapinngisamik amerlanerpaanit pissarsiarineqarsinnaalissalluni. Tamanna aamma aningaasaliissutit ukiuni kingulliunerusuni amerlineqarsimaneranni takuneqarsinnaavoq. Tassunga ilanngutissaaq illup sanaqataalluni illuliassatut neqeroortigineqarsinnaasup ineriartortinneqarnera. Inuiaqatigiittut illuliortiternermut piumasaqaatit qaffatsikkiartuinnaratsigu unammillernarpoq, taamaalillunilu siornatigut taama qaffasitsigisunik piumasaqaateqartoqanngikkallarmat pisartunut sanilliullugu, illuliorneq pisariunerujartuinnarpoq.

Taamaattumik inissiamik maannakkornit sananissaa akikinnerusunik, kisiannili ajornerunngitsunik neqeroorteqarnissamik periarfissaqalernissaa Naalakkersuisut annertoorujussuarmik aalluppaat – inissiaq ajornanngippat pitsaanerujussuusariaqarpoq.

Taamaattumik Ineqarnermut, Sanaartornermut Attaveqarnermullu Naalakkersuisoqarfiup najoqqutassap, innuttaasunut iluaqutaasinnaasup, ineriartortinneqarnera ingerlattuaannarpaa. Taamaalillunga Naalakkersuisut sinnerlugit ineqarnermi isumasioqatigiinnermi ulloq 9. marts 2016 Upernavimmi pisussami, najoqqutassaq nutaaq sanajuminarnerusoq aammalu akikinnerusussatut naatsorsuutigineqartut, saqqummiutissamaarpara. Saqqummiussinissaq taanna qilanaaraara.

7. Apeqqut 6-mi piviusunngortinneqassappat malittarisassat suut allanngortinneqartariaqarpat?

AKISSUT: Najoqqutassaq nutaaq naammassillugu ineriartortinneqartussaavoq misilerarneqartussaallunilu aammalu inatsimmi allannguuteqartitsinissaq pisariaqarani.

Inussiarnersumik inuulluaqqusillunga

Knud Kristiansen